

La Posta cun in resultat da record

La Posta sto uss er pajar taglia

DA LUCAS DEPLAZES / ANR

■ L'onn passà ha La Posta recaltgà cun 911 milliuns francs in resultat da manaschi da record. Il gudogn net munta a 626 milliuns francs, 146 milliuns francs damain che 2012.

Cun La Posta va i bain

Cun La Posta va i bain, ha confermà *Peter Hasler*, il president da La Posta SA, ier davant las medias a Berna. La Posta è sin ina basa finanziaria stabila e sauna. Ella guarda cun optimissen en l'avegnir. Dapi in onn porta l'interpresa il vestgì d'ina societad anonima (SA), mo ella resta vinavant ina domena da la confederaziun, pia in servetsch public, nua ch'il pievel ha l'ultim pled, sch'el vul quai. La Posta dispona actualmain d'in agen chapital da 5,6 milliardas francs. La Posta offria prestaziuns d'auta qualitat per in pretsch favuraivel. En cumparegliaziun cun l'exteriur essan nus uss anc pli favureivel, ha sincerà Hasler.

Cun ina svieuta dad 8,5 milliardas francs l'onn passà è il manaschi restà sin il nivel operativ da l'onn 2012. Il retgav da manaschi da 911 milliuns francs è 50 milliuns francs pli aut che l'onn avant e munta in resultat da record. Dal quint da l'onn 2013 resorta in gudogn net da 626 milliuns francs, u 146 milliuns damain che 2012. Quella reduziun è la consequenza da diversas midadas internas ed il fatg che La Posta è da nov suttamessa a la taglia d'interpresas. Il cussegl d'administraziun propona da sbursar 180 milliuns francs a la confederaziun.

94 milliuns taglia

Cun la nova situaziun giuridica è La Posta uss er suttamessa a la taglia da la confederaziun, dals chantuns e da las vischnancas. Sco quai ch'il schef da las finanzas, *Pascal Koradi*, ha confermà envers l'Agentura da novitads rumantscha quinta La Posta per l'onn 2013 cun var 94 milliuns francs taglia. Da quella summa van in terz a la confederaziun e dus terzs als chantuns e vi-



Peter Hasler, il president dal cussegl amministrativ da la Posta Svizra SA, durant la conferenza da bilantscha ier a Berna.

KEYSTONE

schnancas. La repartiziun als chantuns succeda tenor ina clav da cunvegna.

Tut ils secturs fan gudogn

Cun las brevts – la pitga la pli impurtanta sin il sector da communicaziun – ha recaltgà La Posta quasi trais milliardas francs, in zichel damain che l'onn 2012. Il dumber da las brevts cun adressa è sa sminuì per 2%, percunter ha augmetà il dumber dals stampats senza adressa per 1,7%. Fin l'onn 2015 restan las brevts fin 50 grams suttamessas al monopol e muntan la basa finanziaria per garantir il servetsch public. Vegniss il monopol dismess, stuess vegnir definì da nov il servetsch public, ha punctuà Hasler. Il dumber da pachets ha cuntanschì 114 milliuns, quai munta 3% dapli che l'onn avant.

PostFinance SA

Cun la nova structura giuridica ha er PostFinance in agen cussegl d'administraziun. Ella è uss suttamessa a la Finma. PostFinance SA cun var trais milliuns clients dispona d'ina quota d'agen chapital da 20,7%, ella stat sin ina basa finanziaria fitg solida. Il chapital dals cliens è s'augmetà l'onn passà per 4,3 milliardas francs sin 113 milliardas. Sin il sector dals pajaments è La Posta sin l'emprima posiziun. Di per di segirescha ella var 2,5 milliuns transaziuns. Cumbain ch'ella n'ha betg lubì fatschentas che cunterfan a las leschas ha ella dumandà da vegnir tractada en connex cun l'America tenor la categoria II. Per eventualas multas na sajan vegnidas fatgas naginas reservas.

Persunal

Tut en tut è occupadas tar La Posta 54 000 persunas, repartidas sin 44 105 plazzas cumplainas, 500 posts da lavur damain che l'onn 2012. Vitiers vegnan anc 7000 persunas occupadas en l'exteriur. La Posta offrescha als var 2000 emprendistas ed emprendists diversas pussaivladads professunalas.